

31 JUL 1997

Mahathir-Perlumbaan

MALAYSIA MAMPU LAHIR PEMANDU FORMULA ONE HANDAL

KUALA LUMPUR, 31 Julai (Bernama) -- Datuk Seri Dr Mahathir Mohamad percaya Malaysia mampu melahirkan pemandu kereta Formula One yang handal pada masa depan setanding dengan pemandu-pemandu antarabangsa yang lain.

Perdana Menteri berkata dengan adanya perlumbaan go-kart di negara ini akan menjadi titik tolak ke arah mencungkil pemandu kereta Formula One negara untuk menyaingi pemandu luar negara.

"Perlumbaan go-kart ini merupakan satu permulaan yang baik untuk melahirkan pemandu Formula One serta mencapai tahap tinggi dalam sukan bermotor di negara ini," katanya ketika berucap pada majlis penerimaan Piala Perdana Menteri serta pelancaran perlumbaan go-kart INDY 40 Enduro di sini hari ini.

Perlumbaan anjuran MOFAZ Motorsport Sdn Bhd itu akan berlangsung pada 30 Ogos ini di Langkawi yang disertai 40 buah pasukan daripada badan-badan korporat.

Dr Mahathir berkata walaupun masanya terlalu singkat untuk melahirkan pemandu Formula One negara menjelang Grand Prix Formula One di Malaysia dua tahun lagi (1999), tetapi ia satu perkembangan yang baik bagi sukan itu di negara ini untuk jangka masa panjang.

Beliau berharap perlumbaan go-kart itu akan dapat dijadikan acara tahunan sempena menyambut Hari Kemerdekaan.

Justeru itu beliau menyeru pemandu-pemandu berbakat di negara ini supaya tampil untuk diketengahkan di peringkat antarabangsa di mana sukan bermotor kian mendapat pengiktirafan dunia.

Sementara itu, Presiden MOFAZ Motorsport Mohamad Fauzy Abdul Hamid berkata perlumbaan itu juga akan turut disertai negara luar termasuk masing-masing dua dari Singapura dan Thailand serta satu dari Korea Selatan.

Beliau berkata penganjuran perlumbaan itu juga adalah selaras dengan saranan Dr Mahathir untuk menjadikan sukan bermotor sebagai sukan popular di negara ini.

-- BERNAMA

ERE AKD